

Gou Dwg Duz Roegiq Ndeu

我是一只小小鸟

环江思恩镇清潭小学六年级 崔家僖

Miz seiz gou gamjdaengz swheij lumj duz roegiq ndeu, siengj mbin, hoeng baenzlawz hix mbin mbouj sang. Doxnaeuz miz ngoenz ndeu gou douh youq gwnz nyefaex dauq bienq baenz muzbyauh bouxdwknyaen, gou mbin daengz gwnz mbwn cix fatyienh swheij daj seizneix mbouj miz baengh lo……

Ai! Yienzlaiz gou hix miz aen ranz vuenyungz ndeu. Hoeng, baez fangzhwnz dwglau ndeu sawqmw haeujdaeuj, hawj gou mbouj miz ranz youq. Ngoenzhaenx, mbwn gvengq, ndit rongh ndei, daengx ranz dou cingq gwn mak. Sawqmw h, aenranz saengdoengh hwnjdaeuj. Daxboh nyinh-naeuz fatseng deihoengh lo, byaij daengz bakdou baez yawj, cijraen baux vunz ndeu cingq “vwng vwng vwng……vwng vwng vwng……” dwk gawq aen ndang goenglaux gofaex. Goenglaux gofaex hemq ndaej gig camj gig sim’in. Daxboh heuh dou gaenjaep deuz mingh, hoeng, baez yaep ndeu, mbwn baengq dei cingq, gou aenvih doeksat couh maez gvaqbae.

Dang gou singj daeuj seiz, cingq gutgungq youq ndaw rungj daxmeh, gij rungj daxmeh gou lwedbwed dwk, gou gig siengsim, cuengq sing daej hwnjdaeuj “daxmeh,daxmeh……” A! Dou saetbae aen ranz yienzlaiz lo. Daengx benq gofaex deng raemj liux lo, go’nywj gaeng lumj gij bohliiz soiq nei, dujva hix lumj daengx ndang max deng faen baenz haj…… Yawj daengz daengx aen ranz vaihvadvad, gou gig siengsim, vihliux lix diuz mingh, gou cij ndaej deuz ok ranz.

Gou youq gwnzmbwn mbin le gig nanz, gig nanz, gou dungx iek goenjlulu, mbouj miz rengz, cij gamjdaengz daengx ndang saenz mbouj dingz, doeklaeng gou couh mbouj rox nyinh gijmaz lo. Dang gou caiq baez singj daeuj seiz, fatyienh swheij youq ndaw ranz baux guhhong ndeu, yienzlaiz dwg bauxvunz simndei ndeu gouq gou.

Gou youq ndaw ranz moq neix gvaq saedceij geij ngoenz, miz ngoenz ndeu, bauxcawjiq doiq gou gangj: “Ndangdaej mwngz seizneix hoizfuk ndaej gig ndei, mwngz mbin baema ba, daswyenz cix dwg



ranz mwngz.” Dingq le gij vah neix, gou gig gamjdoengh, dotdot ndaw fwngz bauxcawj, youh ma daengz gwnz mbwn maqmuengh gou, caen geizheih ya, ngoenzneix mbwn daegbied lamz, fwj daegbied hau, gou diemheiq laeg dwk, caen cwxcaih ya! Gou ngaem gyaeuj baez yawj, ngoenzgonq, gij hoenz ndaw gunghcangj baiz ok haenx gaengq bienq seuqsat lo. Gou gig siujsim dwk yiengq baihlaj mbin bae, gwnz haw gehhongh seuqsat raixcaix. Gou laebdaeb mbin bae naj, hi, bang vunz ndeu cingq nyaengq dwk baet loh iq ne.

Yienzlaiz gyoengqde cingq gaihcanj gij hozdung ranzmbanj gyaunde. Gou mbin ya mbin ya, mbouj roxnyinh couh mbin daengz ranz gou lo. Seizneix, gyoengqvunz vihliux bouj gij loek swheij, cingq ndaem faex caux dieg ndoeng ne. Gou saengq gvaq mbouj geij nanz, gizneix youh dwg gizdieg heusdswd ndeu. Ye! Gou youh miz ranz moq lo, gou youh miz ranz moq lo!

(指导老师:玉洁)

Doengzhag Gou

我的同学

环江思恩镇西南小学六年级 韦雅情

Ngoenzneix gou yaek haenhhaenh baux doengzhag ndeu. Baux doengzhag neix, heuhguh Lij Fangh. De bineix cib bi lo, mbouj sang mbouj daemq, doiq lwgda ronghsagsag, aen ndaeng iqet, gwnz naj maj miz aen cenjlaej ndeu, baez riu hwnjdaeuj diemzsis. De mboujdanh yozsiz ndei, caemhcaiq sim gig ndei.

Geiq ndaej miz baez ndeu cuengqhag, gou caeuq Lij Fangh caez byaij youq gwnz loh baema ranz. Sawmwh, dou fatyienh miz duz malwg ndeu ninz youq gwnz loh saenzdedded. Lij Fangh sikhaek byaij gvaq henz duz malwg bae yawj, yienzlaiz duz malwg neix din deng sieng, byaij mbouj ndaej lo. Lij Fangh raen daengz yienghneix, coenz vah ndeu hix mbouj gangj, couh umjdawz duz malwg ma ranz. Daengz ranz le, de sien bang malwg suek gizsieng, caiq bang malwg swiq ndang. Daxmeh de raen le, ndatheiq naeuz: “Mwngz bae gizlawz gip ndaej duz malwg neix ma, vaiq cuengq de okbae bw.” Lij Fangh gouz daxmeh naeuz: “Daxmeh, duz malwg neix din deng sieng lo, raeuz couh louz de youq ranz raeuz ba!” Daxmeh de mbouj han, Lij Fangh rox daxmeh mbouj doengzeiq lo. Yienghneix, de couh dawz duz malwg cang youq ndaw loengxcej, laeglemx cuengq youq aen gungx lajlae mbouj miz vunz raen haenx, yienghneix de couh ndaej moix ngoenz ciuqgoq malwg lo. Hoeng, gienh saeh neix mbouj geijnanz couh deng daxmeh de rox lo. De cijndaej doiq daxmeh gangj dauhleix: Gijmaz gyaehhoh dungvuz la, gijmaz malwg gig hojlien lai…… Doeklaeng, daxmeh de dauqdaej deng de gangfug lo. De riu lo, riu ndaej gig diemz.

Lij Fangh doengzhag baenzneix gyaeh doenghduz caen cigndaej raeuz yozsiz.

(指导老师:罗凤)

Ngamq cuengqhag, gwnzmbwn sawqmw laep roengzdaeuj, lumj deng vunz yungh raemxmaeg swiq gvaq nei. Baez yaepda, rumz hung bongj daeuj, sing goenjhuu, ci daengz gwnz mbawfaex, fatok sing yiengj hung, couh yaek doekfwn lo.

Yawjdaengz gijneix, gou simgip lumj feiz coemh, lienzmuengz buetok bakdou hagdangz, cijraen bakdou hagdangz luenh baenz dong ndeu. Gou gaenjieng dwk yiengq seiqfueng muengh yawj, hoeng ra mbouj raen daxbuz, ndawsim gou lau raixcaix. Gou mbouj caj raen daxbuz couh riengz doihvunz yiengq ranz daxbuz byaij bae.

Byaij daengz bakdou ranz daxbuz, cijraen fajdou gven gaenj lo, gou yunghrengz roq fajdou, caenh dingqny sing roq, cix dingq mbouj ok ndaw ranz miz saekdi singyaem. Daxbuz ranz-nden okdaeuj doiq gou naeuz: “Daxbuz mwngz caeux bae hagdangz ciep mwngz lo.” Dingq daengz coenz vah neix, gou ngaengwd lo, youq ndaw hagdangz gou vihmaz mbouj raen daxbuz gou ne?

Seizneix, henzmbwn youh yiengj



环江思恩镇西南小学 韦海椰

hwnj sing byajraez daeuj, doek fwnraq lo. Gou lumj raen daxbuz ndwn youq ndaw fwn simgip dwk ra gou nei. Gou lienzmuengz yiengq ranznden ciq ndaej aen liengj ndeu, dauqbae hagdangz ra daxbuz.

Byaij daengz bakdou hagdangz, gou yawjdaengz naj bakdou vunz noix lo, mbouj lumj haxbaenh baenzhaenx luenh. Aenvih gyoengqvunz cungj daenj buhyijyih, gang liengj, gou cijndaej ndonj gvaq gyoengqvunz bae ra daxbuz, danhseih lij ra mbouj raen daxbuz.

Fwn yied doek yied hung, rumz yied bongj yied haenq, liengj gou deng

rumz ci vaih lo, buh dumz lo. Gou simgip raixcaix, buet haeuj ndaw hagdangz bae ra daxbuz. Gou youq gwnz cauhcangz ra, hix ra mbouj raen daxbuz, gou gip ndaej raemxda cungj lae roengzdaeuj lo.

Sawqmw, henz rwz gou cienz daeuj gij sing youh sug youh gip haenx: “Siujhoengz, mwngz bae gizlawz la? Gou dauqcawq ra mbouj raen mwngz.” Gou cienq ndang daeuj yawj, yienzlaiz dwg daxbuz, cijraen gwnz naj de cungj dwg raemxfwn, buhvaq hix dumz lo, fwngz swix gwed aen liengj ndeu, fwngz gvaz lij gaem aen liengj caengz hai ndeu, aen liengj neix dwg soengq daeuj



hawj gou a. Gou hemq dwk “daxbuz” sing ndeu, raemxda couh gag lae roengzdaeuj lo. Daxbuz gipmuengz byaij gvaqdaeuj umj gou, gou lienzmuengz yungh liengj bang daxbuz dangj fwn hung.

Fwn lij doek, rumz lij bongj, gou caeuq daxbuz gwed liengj ma ranz. Youq gwnz loh, gou cam daxbuz: “Daxbuz, mwngz nit lwi?” Daxbuz gangj: “Mwngz ne? Gou mbouj nit.” Dingq daengz vah neix, raemxda gou youh nyaenx mbouj ndaej doek roengzdaeuj lo.

Daxbuz, gou gyaeh mwngz!

(指导老师:罗少维)